

Na osnovu čl. 4.2., 4.7. i 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju (“Službeni glasnik BiH”, broj 2/05) i člana 16. Pravilnika o licencama – Prečišćeni tekst (“Službeni glasnik BiH”, broj 63/16), rješavajući po zahtjevu pravnog lica “EFT HE Ulog” d.o.o., Kalinovik, od 29. juna 2026. godine, na sjednici Državne regulatorne komisije za električnu energiju, održanoj 9. septembra 2026. godine, donesena je

ODLUKA

O IZDAVANJU PRIVREMENE LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Pravnom licu “EFT HE Ulog” d.o.o., Kalinovik, izdaje se privremena licenca za obavljanje djelatnosti međunarodne trgovine električnom energijom.
2. Privremena licenca iz tačke 1. ove Odluke izdaje se za period od 10. septembra 2026. godine do 9. septembra 2028. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom (“Službeni glasnik BiH”, broj 14/16).
3. Privremena licenca za obavljanje djelatnosti međunarodne trgovine električnom energijom sastavni je dio ove Odluke.
4. Vlasnik privremene licence je u obavezi plaćati regulatornu naknadu u periodu važenja privremene licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a njen dispozitiv bit će objavljen u “Službenom glasniku BiH” i službenim glasilima entiteta.

Obrazloženje

Pravno lice “EFT HE Ulog” d.o.o., Kalinovik (u daljnjem tekstu: podnosilac zahtjeva), podnijelo je Državnoj regulatornoj komisiji za električnu energiju (u daljnjem tekstu: DERK) zahtjev za izdavanje licence za obavljanje djelatnosti međunarodne trgovine električnom energijom, zaprimljen pod brojem 05-28-12-198-1/26 od 29. juna 2026. godine.

Shodno članu 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11) za aktivnost međunarodne trgovine električnom energijom potrebna je licenca DERK-a, a podnosilac zahtjeva je dužan zadovoljiti uvjete i kriterije za izdavanje licence koje svojim pravilima i propisima odredi DERK.

Zahtjev je podnesen na propisanim obrascima, s dokazom o prethodno izvršenoj uplati naknade za rješavanje zahtjeva i relevantnim dokumentima koji su omogućili DERK-u da razumije, razmatra i odlučuje o podnesenom zahtjevu, o čemu je obavijestio podnosioca zahtjeva svojim aktom broj 05-28-12-198-3/26 od 8. jula 2026. godine.

Po pregledu i provjeri svih formalnih elemenata zahtjeva, DERK je 9. jula 2026. godine objavio u dnevnim novinama i na svojoj internet stranici kratku obavijest za javnost sumirajući zahtjev za izdavanje licence i odredio rok do 17. jula 2026. godine za dostavljanje komentara javnosti na podneseni zahtjev.

DERK je konstatirao da nisu dostavljeni komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješača.

DERK je izvršio provjeru podataka, dokumenata i informacija priloženih uz zahtjev i utvrdio da isti svjedoče o tehničkim, pravnim i finansijskim mogućnostima podnosioca zahtjeva da ispuni sve kriterije, uvjete i standarde propisane zakonom, te pravilima i propisima DERK-a, za dodjelu licence za obavljanje djelatnosti međunarodne trgovine električnom energijom.

Uvažavajući činjenicu da je zahtjev za izdavanje licence podnesen prvi put, DERK se, u skladu s članom 5. stav 4. Pravilnika o licencama – Prečišćeni tekst, opredijelio za izdavanje privremene licence u trajanju od dvije godine.

Stoga je pripremljen Nacrt odluke o izdavanju privremene licence, koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom. Ovaj dokument je od 24. jula 2026. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 30. jula 2026. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici, po podnesku DERK-a broj 05-28-12-198-14/26 od 3. augusta 2026. godine, nije isticao neslaganje s bilo kojom odredbom Prijedloga odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne energije u BiH i podzakonskim propisima koji reguliraju predmetnu materiju.

Po isteku svih rokova za dostavljanje komentara ili za uključivanje u ovaj postupak u svojstvu umješača, 26. augusta 2026. godine DERK-u se obratilo Federalno ministarstvo okoliša i turizma, ukazujući na aktivnosti koje se odnose na procjene utjecaja na okoliš proizvodnog objekta podnosioca zahtjeva u režimu proizvodnje električne energije. Iako planirano, donošenje konačne odluke u ovom postupku povučeno je s dnevnog reda sjednice DERK-a zakazane za isti dan, kako bi se razmotrili pristigli komentari Federalnog ministarstva. Međutim, argument Federalnog ministarstva, sadržan u dostavljenoj dokumentaciji o osporavanju izdate ekološke dozvole podnosiocu zahtjeva pred nadležnim sudovima u Republici Srpskoj pravno je irelevantan u postupku izdavanja licence DERK-a, jer ekološka dozvola entitetskih ministarstava nije uvjet za izdavanje licence za obavljanje djelatnosti međunarodne trgovine električnom energijom. Osim toga, proizvodnja električne energije u konkretnom proizvodnom objektu podnosioca zahtjeva, a time i eventualne negativne implikacije po okoliš, ne ovise o navedenoj licenci DERK-a, budući da je za rad ovog objekta za proizvodnju električne energije prije više od godinu dana izdata dozvola za proizvodnju električne energije Regulatorne komisije za energetiku Republike Srpske (RERS). Jedan od uvjeta za izdavanje dozvole RERS-a je ekološka dozvola Ministarstva za prostorno uređenje, građevinarstvo i ekologiju Republike Srpske, te su eventualne sudske odluke u postupku osporavanja ekološke dozvole pravno relevantna činjenica za neometano korištenje dozvole za proizvodnju električne energije, a ne za postupak izdavanja ili korištenje licence za međunarodnu trgovinu električnom energijom. Federalno ministarstvo je 2. septembra 2026. godine obaviješteno o toku postupka i prirodi djelatnosti za koju licencu izdaje DERK. Ni u obraćanju Federalnog ministarstva, koje je DERK-u dostavljeno 7. septembra 2026. godine, nije naveden niti jedan relevantan argument koji bi mogao utjecati na donošenje konačne odluke.

Na osnovu svega naprijed navedenog, uvažavajući činjenicu da je podnosiocu zahtjeva 5. marta 2025. godine, na period od pet godina, izdata Dozvola Regulatorne komisije za energetiku Republike Srpske za obavljanje djelatnosti proizvodnje električne energije registracijskog broja 01-1515-04-1/123/25, DERK je odlučio kao u dispozitivu ove Odluke.

U skladu s članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-198-19/26
9. septembra 2026. godine
Tuzla

Predsjedavajući Komisije

Dr. sc. Milenko Tomić